



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Martini Lvtheri Piae Ac Doctae Operationes In Dvas Psalmorvm Decades

Luther, Martin

Basileae

VD16 L 5540

Nisi conuersi fueritis, gladium suum uibrabit: arcum suum tetendit, &  
parauit illum.

**urn:nbn:de:hbz:466:1-37005**

Nisi conuersi fueritis, gladium suum uibrabit: arcum suum tenet, & parauit illum.

Hebræi sic: Si non conuertet, gladium suum acuet. Quamquam & qui acuit, expolit gladium, reddit eum uibrantem, ut non longe distet acere & uibrare. Illud, si non conuertet, dubium est, an ad dei comminationem, uel ad impiorum conuertendum pertineat. Licet Hieronymus referat ad conuertendum, dicens: Non conuertenti gladium suum acuet. Forte absolutum uerbum est, uel: Si non conuertet, id est, si non erit conuersio. Verum siue dicas, nisi conuersi fueritis, siue, non conuertenti, siue, si non erit conuersio, nihil perit sen eorum, quam potius uideamus.

Propheta ex crassa & humana similitudine desumit pro terrore incutendo doctrinam, quia contra insensatos & induratos loquitur, qui iudicij diuini seueritatem (de q̄ prædixerat) non capiunt, nisi humanæ seueritatis usu indicantur. Ideo non uirgam, non baculum, non deniq; ullam adducit inter homines disciplinæ seueritatem, nisi eam quæ mortem infert, gladium scilicet, & arcum, ut inculcet æterni iudicij, æternæ mortis, æternæ seueritatis sententiam. Quid enim gladius dei est, nisi uerbum iudicij æterni? De quo ad Hebræos. iij. *Uerus est sermo dei, & penetrantior omni gladio bicipiti, q̄ dicit: Ite maledicti in ignem æternum. Gladij enim uocabulum scindendi, & interficiendi opus consignificat, præsertim cum ad id acui, & uibrari dicatur.*

Ad eosdem insensatos pertinet, q̄ non contentus gladij intentione, addit & arcum, nec arcu contentus, sagittas enim describit, adeo dura est ceruix & frons impietatis, ut tot comminationibus opus ei sit, nec sic tamen mollescat. Idem autem est arcus quod gladius, uerbum scilicet iudicij, per aliud, & aliud repetitum & significatum. Q̄ dicit parauit illum, idem est uerbum quod supra, dirige iustum: ut arcum paratum intelligas, tensum & directum ad iam iam feriendos impios, sicut gladium uibratum ad scindendos.

Pulchre autem his uerbis iram dei proximam super impios describit, quod tamen non intelligunt, donec senserint. Quid enim profuisset Absalom & Achitophel, si multa milia annorum in sua malitia præualuissent, & tandem subito gladio iræ dei in æternam mortem abscissi fuissent? Nihilominus repente & proxima eis fuisse ira uideretur. Ita Ecclesiast. v. *Ne dixeris peccauit, & quid mihi accidit triste? Misericordia enim, & ira ab illo cito approximant, & in peccatores respicit ira eius. Ne tardes conuerti ad dominum, & ne differas de die in diem, subito enim ueniet ira illius, & in die uindictæ disperdet te.* Et psalmo. xxxij. *Vultus autem domini super facientes mala, ut perdat de terra memoriam eorum.*

Et in eo parauit uasa mortis, sagittas suas ardentibus effecit.

Perstat in similitudine, sed apte simul æternum cruciatum exprimit, qui est mori & ardere. Vas hebraismo, significat omne instrumentum generali uocabulo, omnium rerum, ut psal. lxx. *Confitebor tibi in uasis psalmi, id est, instrumentis musicis.* Et Ezech. ix. *Et unusquisq; uas interfectionis habet in manu sua, id est, instrumentum mortis, seu, ad interficiendum.* Sic Act. ix. *Paulus Apostolus, uas electionis dicitur, quod ab ignaris hebræi idiomatis non intelligitur idem esse, quod latine instrumentum electum, quod scilicet, eo uoluerit Christus*

Gladius dei  
quid.

Dura ceruix  
impietatis.

Vas instru-  
mentum he-  
braismo.